

Najugaq qimannagu inunnik isumaginninnermut siunnersortitut ilinniagaqalernissaq anguniarlugu suliamik aallartitsinissamik periarfissaqaleqqullugu Naalakkersuisut peqquneqarnissaannik apeqquteqaat aallaavigalugu oqallinnermik siunnersuut.
(Naleraq)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siunnersuummik matuninnga apeqquteqaat aallaavigalugu oqallinnissamut siunnersuuteqartoq Naleraq Naalakkersuisut sinnerlugit qutsavigaara.

Siunnersuuteqartoq isumaqatigaara, kommunit sullissisarfiini sullissisut sulianik ilisimasaqarluarnerisa amigaataanera naammaginngilaq. Sullissisartut tamarmik inunnik isumaginninnermut siunnersortitut assinganilluunniit ilinniagaqarsimanissaat kissaatiginaraluarpoq, taava sulianik ilisimasaqarluarneq tunngavigalugu sullissisoqassagalarpoq.

Siunnersuuteqartoq §37 tunngavigalugu apeqqut, nr. 17 2022-meersoq, issuaaffigaa, tassani imatut akissuteqarsimavunga: "Najugaq qimannagu inunnik isumaginninnermi siunnersortinngorniarnermik pilersitsinissaq pillugu oqaloqatigiinnissaq Naalakkersuisut ammaffigaa". Issuaaffigineqartumi oqariartuutigineqarpoq, isumaginninnermut tunngatillugu ilinniartitaanernik neqeroortoqartoq, tassa siunnersortit assistentiattut ilinniarneq, inuussutissarsiutinut ilinniartitaanerusoq, aammalu inunnik sullissinnermut siunnersortitut ilinniarneq, taannalu ilinniagartuutut ilinniartitaanerulluni.

Ilinniartitaanerit taakku taassallugit naleqquppoq, tassa siunnersortit assistentiattut ilinniarneq aammalu inunnik sullissinnermut siunnersortitut ilinniarneq isumaginninnermik suliaqareersunut neqeroorutaagamik, tassungalu kommunini isumaginninnermi sullissisut ilaallutik. Apeqquteqaat aallaavigalugu oqallinnissamik siunnersuummi sullissisut pineqartut ilinniartitaanerit taaneqartut atorlugit piginnaangorsarneqarsinnaapput.

Anguniagaq tassaasimassaaq, isumaginninnermi sullissisut inunnik isumaginninnermut siunnersortitut ilinniarsimangitsut piginnaangorsaqqinnissaat. Inuit pineqartut sullissinnermi misilittagaqqortuujupput tunniussimallutillu. Sulisut taakku allamut nuuttariaqaratik, kollegiami najugaqartariaqaratik ilinniagaqarnerisutillu inuussutigisariaqarnagit ilinniagaqaqqinnermik periarfissinneratigut piginnaasatigut qaffassarneqarsinnaapput. Sulisut pineqartut suliffitsik attatiinnarlugu neqeroorfigineqartassapput, sulisullu ilinniariaraangata kommunit taartissamik periarfissinneqartassallutik. Naammassigaangamikku diplomertalimmik ilinniartitaanermik naammassisaqarsimanerminnik allagartartaassallutik.

Taamatut oqaaseqarlunga Naalakkersuisut qilanaarutigaaq pissarsiffiusussamik pitsaasumillu oqallittoqarnissaq.